



七月時

七月初一鬼門開，好兄弟做一下放放出來。這個月个禁忌全然多，序大人會吩咐細子，暗夜時頭好莫出門，衫褲日頭落山進前即愛收起來，若無，得好兄弟碰著，你即會衰運。莫去泅水，水底有水鬼捉交替。暗夜時更加毋會用歎哦、歎簫，若無，即會枷好兄弟做一下請請來。毋會用講「鬼」這字，好兄弟會當做你在喊佢。毋會用在別儕个後背搭佢个肩頭，會驚死人。聽著後背有人在喊你，毋會用單單幹頭定，愛歸身人做一下幹過去。毋會用烏白捉蚌蜆、金龜這兜細隻蟲，無定著遐即係鬼个化身。嘛毋會賞「錢仙」、「碟仙」、「箸仙」這兜，若無即會「請鬼容易送鬼難」惹鬼上身，劫數難逃。在荒郊野外，屙尿進前愛先講「否勢，否勢，借用一下」若無會得罪著佢人。所以講舊曆七月正經係一個禁忌个月。

七月禁忌雖然多，毋過嘅有一個真浪漫个日，即係七月初七情人節，相傳這日牛郎和織女會在天嶼行過鵲鳥搭起來个橋相會，正經係一個淒涼又靚个故事。這日阿依攏會在頭前坪園一張長凳，凳面上排七碗卵酒抑係肉酒拜七娘媽。這時務枷歸下細子做一下喊喊俾來，做埤拜拜个，交代細子枷頸面上个綦提落來，拜拜燒莫，攞枷新个綦拜拜過香爐一下，一個一個枷佢人掛在細子个頸，保護細子平安勢大漢。代表爺哀對序細个愛。

七月半更加係一個要緊个日，中元普渡，祭拜好兄弟，代表百姓對好兄弟个敬畏和慈悲。嘛代表臺灣在清朝時務係移墾社會，真多羅漢腳變做無主个孤魂。透過中元个祭拜，希望這兜孤魂會用出來寮寮，享受一下人間个祭拜，會用安心轉去地府，早一日出世來做人。七月雖然係禁忌个月，毋過嘛係感恩、慈悲个月。

作者：李秉璋

☆詞彙學習☆

【鬼門開】gui^ˊ mun^ˊ koi^ˊ：指地獄鬼門關開門。

【好兄弟】hoo^ˊ shang^ˊ te^ˊ：此處指鬼魂。

【水鬼】fi^ˊ gui^ˊ：住在水中之鬼。傳說會在水中捉人將之溺斃以代替他受水中之苦，即「捉交替」。

【歎哦】pun^ˊ sid^ˊ：吹口哨。傳說在七月晚上吹口哨、吹簫，因聲音淒涼，頻率接近鬼魂，易吸引他們過來，因此成為七月禁忌之一。

【歸身人】gui^ˊ shin^ˊ ngin^ˊ：整個人。

【箸仙】chi sien^ˊ：一種用筷子請鬼神之簡單儀式。用兩支筷子互相抵住，口中念念有詞請筷仙降臨。

【長凳】chong^ˊ den^ˊ：木製狹長形且無靠背的椅子，以前農村常放於餐桌前，或是配合八仙桌使用。

【七碗卵酒】cid^ˊ bban^ˊ lon^ˊ ziu^ˊ：祭拜七娘媽的祭品，用酒煮蛋，分盛七碗。

【綦】guen^ˊ：小孩子在未滿 16 歲前，在脖子上掛一條用紅色絲線所做保平安的紅線，就是「綦」。滿 16 歲以後，代表成年可不用再掛，稱為「脫綦」。

【地府】ti fu^ˊ：地府指鬼魂所住的陰間。人死後若未能成仙上天堂者，住在陰間。